

新元史

第五五册

列傳第一百二十六

新元史卷之二百二十九

賜進士出身日講起居注官翰林院侍讀國史館纂修膠州柯劭忞撰

循吏

古者治民之吏事權一而責任專縣之事專於令郡之事專於守故無所牽制而吏得展其才至元之官制則不然縣有尹有令府州有知府知州路有總管而皆設達魯花赤以監之凡爲達魯花赤者非蒙古則色目人皆懵於中國之治術者也夫旣以達魯花赤監吏矣則吏之權已奪於達魯花赤使其賢猶將與吏爭是非可否而牽制其所爲而况懵於治術者乎雖潔已愛民者

亦時有之然其姦貪枉法虐殺無辜史固不絕於書也
此元之吏治所以日窳而盜賊所以不息歟吾徵之刻
石凡去思遺愛之碑頌達魯花赤總管以下之德政存
而未佚者尙得五六百事大抵皆空言無實習爲諛美
嗚乎是亦吏治之窳之一端矣今爲循吏傳采其卓有
治行者著於篇庶幾信以傳信云爾

劉義

謝天吉

趙振玉

黃順翁

倉振

曾沖子

張耕

葛榮

齊克中

趙志

王琚仁

杜處愿

劉濟

周惠

李英

許維楨

王德亮

田滋

王安貞

邢裕 秉仁

徐泰亨 陳春

耶律伯堅 陳楚仙

劉輝

柯謙 九思

王肖翁

盧克治

趙良輔 陳炎酉
于宏毅

孫天正

燕立帖木兒

諳都刺

楊景行

干文傳

林興祖

觀音奴

周白強

白景亮

夏日孜

聶以道

盧琦 王大中

野仙不華

鄒伯顏

劉秉直

許義夫

郭思恭

合刺不花

羅文煥

李惟閏

葉森

孔濤

林泉生

繆思恭

劉義遼州人父恩爲金晉陽公郭文振裨將累遷同知
元帥府事金亡率所部來降胡士虎那顏楊惟中交薦
之拜遼州軍民長官佩銀符以老致仕義襲遼州軍民
長官遷同知絳州事再遷孟州知州加武略將軍吏民
畏愛治績爲一路之最至元九年移知臨州孟州人詣
闕上書乞義再任孟州十五年卒於孟州義每到官其
日有四一勸農二興學三勵風俗四不貸枉法吏前後
蒞四州未嘗有敗事云

謝天吉字鍾祥臨晉人累官昭勇大將軍鎮邊元帥行
河中府事賜金符金亡流民多逃難於河南知天吉以

公事至流民相謂曰吾謝帥素有仁名舍此曷歸於是來附者數千人時行省徵發無度天吉計民力必不能供自出家貲助之復又徵黃金百餘笏天吉自度無所出迺假自投於河家屬迎喪至觀者無不泣下徵金事遂寢後又徵役民相謂曰若謝帥在事必不至此左右或謂之曰謝帥實在嚮之死僞也眾皆驚喜同往謁天吉求復領府事天吉起事果寢其爲人所敬信如此卒年五十九

趙振玉大甯龍山人以幹局受知于史天倪選署龍安府庫使改承安令遷軍中都提控武仙反狀已露振玉

請先圖之天倪曰彼鼠子何能爲後天倪爲武仙所襲殺振玉及其兄真定府判官真玉脫身走滿城史天澤復真定命振玉招降臨城杏樹等砦下邢趙二州州民保聚者悉使還故居授慶源軍節度使兼趙州觀察使慶源戶不滿百振玉爲招集流亡勸耕稼通貨易羣盜時出剽掠輒爲振玉所搜捕尋改河北西道按察使兼帥府參謀俄復還慶源軍有白晝殺人於市者振玉案其罪勅怨家婦手刃之闔邑稱快時治郡以振玉稱首云

黃順翁字濟川江西建昌人少勤學卓犖有才氣大兵

至建昌制置使黃萬石順翁族人也將迎降置酒謂順
翁曰明日則子女玉帛皆他人所有君可任意攫之順
翁辭不肯取後郡守請爲盱江書院山長順翁取朱子
小學以教授學者授建昌路儒學教授旋擢武岡路新
甯縣尹民失業久順翁招撫流亡教以種植畜養之法
戶口日增新甯人卽順翁種竹之處立生祠湖南廉訪
副使余恁題曰種竹堂以文記之湖廣盜起右丞劉國
傑率兵討之順翁儒服上謁叩頭曰請以理論之不從
然後用兵國傑從之順翁輿轎從一老兵遇峒民各予
孝經一卷爲講說大義羣盜皆感泣頓首謝罪卽日詣

軍門降國傑大說遂班師後峒民家爲木主書生父黃公以祀之累遷龍興路稅務提領撫州路金谿縣丞皇慶元年調江州路德化縣尹皆有惠政延祐元年乞病歸未幾卒同時倉振爲新州知州時猺賊蠡起振深入賊窟諭以禍福羣猺翕然從命暇日詣學宮與諸生講說經義又於驛路夾植松榕以便行者人歌曰高松茂榕一道清風

曾沖子字聖和撫州金谿人父鈺宋諫議大夫兄淵子參知政事沖子以父任爲瀏陽縣主簿江東西宣撫使趙葵辟佐吉州節制司改知仁和縣累遷知南安軍宋

亡棄官歸至元二十四年以行臺薦除僉福建提刑按察司事閩地險遠吏翫法盜賊屢起沖子行部所至先榜諭吏民以感切之吏悚息或自免去鄉民嘯聚山澤欲出不敢者得榜皆屬至羅拜請罪侍御史吳曼慶聞其事大悅非沖子分部亦檄使按行有囚殺人當死行省私出其罪使沖子泣刑沖子曰如律沖子往泣否則不敢未幾以病致仕大德九年卒年七十八初沖子至仁和有劫盜官論十九人死沖子閱其狀曰非盜也將理出之都城盜發官吏皆當坐幸藉手以免語共侵沖子沖子恚曰吾官不足惜如十九命何力辯之已而果

獲真盜賊具在眾始愧服焉

張耕佚其籍貫中統初爲邢州安撫使兵後戶不滿數百有兩達爾罕言於世祖請選良吏撫治之世祖從其言承制以耕爲安撫使劉肅爲副使邢州大治流民復業又興鐵冶行鈔幣公私兩濟裕宗在東宮嘗曰安得治民如張耕者乎後卒於官

葛榮淇縣人父旺大兵南下旺自奮說郡守率郡人出迎鄉里得全元帥必拉罕置縣蘇門署旺爲令榮授衛輝二州提領譏察使改蘇門主簿蘇門改輝州復提領譏察使擢輝州判官蘇門復縣仍主簿兼尉中統初調

衛州軍民彈壓官兼錄事三年復輝州州判時河北饑
部使頒區田法郡邑不能行檄榮察覆榮躬率野人相
地授方略熟得百倍土之撓墮者教以糞薶鄰境法焉
課最遷蘭台縣令擢磁州判官轉平陸縣令兼諸軍奧
魯以計擒大盜黨吾擢僉嶺南廣西道提刑按察司事
墨吏聞風遁去卒於官年五十五同時齊克中趙志閻
從王琚仁均爲河南北循吏齊克中至元初爲扶溝縣
主簿有能名擢延津縣尹歲大稔民流亡載道克中撫
卹招徠咸得其所及受代去數歲再過延津民感泣送
迎之趙志長葛尹爲政寬和民戴之歲比不登志教民

爲水田旱則決潔水灌之悉爲沃壤民獲其利焉閭從
新安縣尉有販麥商爲賊所殺莫知主名從集吏民至
屍傍跼聽忽一人屏樹立命卒引詰之果服嘗於道中
遇數人僕從若貴游者從曰此巨盜也訊之果得其實
鄰境號爲神明王琚仁涉縣尹縣城爲山水所圯民不
甯居琚仁築堤禦之患乃止及去民爲刻石

杜處愿字榮季霸州信安人父瑛見逸民傳以薦爲按
察司書吏除濟南經歷歲終上計京師建言會計有名
無實徒耗輿馬物力之用政府韙其言罷之遷睢州判
官是年睢水溢幾入城官僚暴露城上吏白城已圯請

具舟楫以逃處愿叱之曰吾有官守逃將安之水竟退
時論壯之改大名路經歷官糴米二萬石給民食處愿
以出納之時吏易爲姦不如徑以錢下於民上其議於
行省從之歲十月宗室例以駝馬下諸路分廐飼之吏
率建廐費多賦之貧民至是處愿均其賦於豪右民大
悅未幾除東昌路推官卒年六十八

劉濟字巨川真定行唐人父信宋義兵都統戰歿濟中
統初以薦擢中書左曹掾遷磨勘官真定民郭文運告
白蕭二人殺其父歲久不決命濟往讞之不終日而虛
實辨真定人稱爲神明至元七年授太原總管府判官

會大水川澤泛溢濟相度形勢鑿渠以洩水勢自是無
漂沒之患九年擢獻州知州下車罪囚纍纍濟裁判五
日獄訟一空遷僉燕南河北道提刑按察司事十六年
卒子珪大名路總管亦有能名

周惠字德甫晉州隰縣人憲宗二年朝廷經略江淮擢
惠江淮都轉運使置轉運司於朶州四年惠入覲圖利
病上之詔以彰德衛輝大名民戶各五千實朶州復其
賦改朶州爲淇州惠治官廨倉庫及境內之廛市阡陌
皆井井有法民貧無食者令習陶甓之業躬爲規勸無
倦色西山鐵官鑛竈久廢惠出貲修復之由是商賈四

集後卒於官子錯淮東高郵路總管

李英字彥臣滑州白馬人叔父宥以宣武將軍知滑州宥卒英襲職歲饑民多逋賦英率其父老見世祖於邢州曰兵興又值饑荒民逃亡盡敢昧死請蠲其逋賦世祖動色從之中統元年蝗食桑蠶賦病民英建言俟秋熟並徵蠶賦如逋負當以身任民德之至秋悉如約以償州隸大名路相距二百餘里英以轉輸勞費請儲於本州候指撥朝廷如所請著爲令兵興甲仗資糧率從豪民稱貸子母旬月相倍英入覲訴其病民陳詞感切執政聽之由是官償其本不收倍息至元二年改順德